

Statistika hornjołužiskich Serbow pruskeho kralestwa.

Podawam tu pokračowanje swojeje statistiki serbskeho naroda. Po prawom běch sebi wotmyslił, hnydom wobličenje a wopisanje cyłych hornjołužiskich Serbow — pruskich a saskich — na dobo podać; tola widžu, zo so to njehodži, z přenja dokelž wšitkón material za statistiku sakskeho Serbowstwa, runjež sym so wo njón hižo wjele prócował, hišće w hromadu nimam, a potom tež dokelž je mi wopisanje pruskich Hornich Serbow pod rukomaj tak přirostło, zo hižo samo cyły zešiwk pjelni. Tuž wobsahuje tutón druhí dźěl mojeje statistiki jenož wobličenje a wopisanje serbskeho naroda w pruskich Hornich Łužicach, a to po móžnosći dokładne po samsnych nazhonjenjach a přepytowanjach, kaž tež po powěsćach a přinoškach serbskich přećelow a wótčincow. Přede wšěm dostach na swoje napominanje wot jenocho młodeho přećela wjele wažnych a autoptiskich zapiskow, kotrež móžach při swojim wobdźěłanju derje wužić. Wšě powěsće su, wjelež je z cyła při tajkim wobćežnym a ze wšelakimi zadźěwkami zwjazanym dźěle móžno, autentiske a prawdziwe; je-li pak tola hdže žadyn zmylk, njech je kóždy čitař a sudzeř přeswědčeny, zo sym bona fide ac sine studio pisał, a njech mi přećelnje poprawjenje a porjedjenje pósće, zo bych jo móhł na kóncu swojeho dźěla w dodawku wočišćeć. Njewěrju wšak, zo budže toho wjele, dokelž sym wšudže, hdžež so mi něšto nje- wěste abo njeprawe zdaše, so dwójcy a trójcy ze wšej prócu hač na wěstosć wobhonjował. Jenó škoda, zo su někotři, na kotrychž běch nuzowany so wobroćić, mi pak njedospołne powěsće podali